

# Spirit of Bosnia / Duh Bosne

An International, Interdisciplinary, Bilingual, Online Journal  
Međunarodni, interdisciplinarni, dvojezični, online časopis

## Nove pjesme

### NAGRADA

U dvorištu Narodne biblioteke podižu  
na kamion kontejner do vrha napunjen  
nevažnim knjigama, osuđenim na smrt  
spaljivanjem u gradskoj toplani kako bi  
oslobodile police za popularna izdanja.  
Kad je kamion krenuo ispalo je nekoliko  
lakših. Jedna tanka sa koricama boje  
trule višnje sletila je ko list na vjetru  
i pala otvorena pred nju na trotoar.  
Djevojka je čučnula i pogledala par  
stihova. "Spasićemo je sirotu", reče  
i gurnu poeziju u njegov ranac.

Taj sam zaljubljeni par vidio uveče  
pod kamenim mostom. Spremali su se  
za počinak, beskućnici. Kad su se uvukli  
u vreću za spavanje i prikrpili jedno uz  
drugo, ona je izvadila knjigu a on upaljač.  
Spržio je palac dok mu je čitala, ali je  
držao plamen sve dok plina nije nestalo.  
Nije mi poznato da je ikada neka knjiga  
pjesama veću nagradu dobila.

Decembar 2012

### KNJIGE

Tokom rata često sam se selio, zaboravljajući  
svaki put pregršt knjiga ili ostavljajući poneku  
koju nisam mogao dalje nositi. Na kraju sam  
prazne šake prokrijumčario preko granice,  
ali verujem da su knjige još u životu.

Nikad neću saznati čiju prašinu dišu u regalima,  
ali zasigurno ih nikad niko ne otvara. Kao da

ozračene leže na policama napuštenih kuća  
oko Černobila. Oko kuća namnožile se šume,  
nakotilo zvjerinje... Jeleni otpalih rogova turaju  
glave kroz prozore i njuše poeziju.

Januar 2012

## **BOSNA**

1.

Ne živim već godinama u zemlji  
gdje sam rođen. Ali je posjećujem  
i to na isti način kao kad smo ko djeca  
obilazili najbližu rodbinu. Iako svoj  
među svojim, osjećaš da si gost.

2.

Poneku riječ više ne prepoznajem.  
I mnoga lica. U selima prazne  
kuće i puni grobovi. Ako odškrineš  
vrata, od živih stvari vidjećeš šaren  
ibrik za kafu i bijele fildžane za njim.  
Kao da kvočka i pilići preko sinije  
prelaze.

3.

Razočarenje stari i suši se s godinama.  
Ali ne gubi na težini.

Januar, 2012

© 2013 Milorad Pejić

The preceding text is copyright of the author and/or translator and is licensed under a Creative Commons Attribution-NonCommercial-NoDerivs 3.0 Unported License.